

Kousando Kanser

Kanser di pechu ta un enfermedat horibel...un enfermedat ku hende muhé ta teme. Algun dama ku tin famia ku kanser di pechu—poniendo nan den e grupo ku tin mas rísiko pa haña e enfermedat—ta laga operá pa kita tur dos pechu. Esaki ta un sla duru kontra e balor propio di un hende muhé. Ma tristu ta ku kanser di pechu ta sigui oumentá.

Awendia diferente estudio ta mostra den direkshon di algun kousa i prevenshon di e enfermedat. Ma straño ku por parse, hopi hende ta ignorá loke ta deskubrí manera Celeste McGovern ta trese dilanti di su artíkulo “The answer nobody wanted.”

Kasi 300 aña pasá, e italiano Bernadino Ramizzina a opservá ku kanser di pechu ta un “enfermedat di sùrnan.” Un deskubri-mentu nobo, publiká pa e revista médiko bretániko *The Lancet* ta konfirmá esaki. E estudio a kompará hende muhé na 30 diferente pais: 50.302 dama ku kanser di pechu kompará ku 96.973 hende muhé sin e enfermedat.

E estudio a yega na konklushon ku kada biaha un dama ta duna lus, su chèn di haña kanser di pechu promé ku 70 aña di edat ta redusí 7 porshento. Ademas, e ta konkluí ku kada aña ku un hende muhé ta duna su yunan pechu ta redusí su rísiko 4,3 porshento adishonal...asta pa damanan ku tin hopi chèn pa haña kanser di pechu.

Pues, si damanan tin mas yu i a duna nan yunan pechu pa dos aña (manera a sosodé 100 aña pasá), por tin un redukshon di kanser di pechu di mas ku 50 porshento na algun pais.

Si e resultadonan di e estudio aki ta korekto, nos por komprendé fásilmente pakiko kanser di pechu a oumentá. “Sabiduria” humano den último dékananan a deskurashá parehanan di tin hopi yu. Dos mes ta basta. Dunamentu di yu pechu tambe tabata deskonsehá un tempu. Maske esei no ta e kaso mas, tòg na Merka solamente mitar di e mamanan ta duna yu pechu. I hopi di nan ta hasi esei pa dos òf tres luna so.

Hende no por mehorá plan di nos Kreador...maske kon inteligente nos por ta. Nos no mester ignorá Su solushonnan, asta ora ta solushon ku nos ke!

Ma otro estudio ta mostra riba un otro kousa preokupante di kanser di pechu.

Na aña 1994, Jane Daling di Fred Hutchinson Cancer Research Center na Seattle, Merka a haña ku hende muhé ku a abortá un yu promé ku nan a duna lus tabatin 40 porshento mas chèn pa haña kanser di pechu. E tambe a deskubrí ku e rísiko di kanser di pechu a oumentá 150 porshento si e dama tabatin ménos ku 18 aña di edat. I e chèn di haña kanser di pechu a oumentá 800 porshento si e tabatin ménos ku 18 aña i a abortá su promé yu dentro di e promé ocho siman di embaraso.

Maske e estudionan no ta konklusivo ainda, e laso entre aborto i kanser di pechu ta birando mas kla dia pa dia. Binti ocho di 37 estudio den revistanan médiko ta komprobá e laso entre kanser di pechu i aborto.

Diferente kos ku un dama por evitá, por kontribuí na e insidentenan di kanser di pechu. Por ehèmpel, bahando man na uso di alkohòl probabelmente ta yuda prevení e enfermedat. Ma ta kuminsá pinta ku aborto ta e rísiko *mas evitable*.

E deskubrimentu aki no ta straña nos. Nos Kreadó ku “*a forma mi riñonan...wef mi, formámi den barika di mi mama*” (Salmo 139:13) ta e mésun Dios ku a bisa “*No mata*” (Eksodo 20:13), “pasobra segun imagen di Dios El a traha hende” (Génesis 9:6). **Aborto ta matamentu di bo mes yu. Bo nunca por violá Dios Su mandamentunan sin sufri e konsekuensianan tarde òf tempran.** Den e kaso di aborto, e konsekuensianan ku hende muhé ta sufri por ta asta fisiko...kousando kanser.